

2 FITA

Fita yana kiluma 'ana veluga.

De'e Fita i kiluma-velugai tovetumagananidi i miave'eve'e'elagiga 'waidie. Tovetumagananidi 'awalawa fuedi 'waidie i miamiani de'e 'adi matakia, fai tove-vekavekali fuedi i sousouyedi. Tovenidi sauluva sakoidi i awave'atumaiedi wata i vonavona igodina Iesu kebu i na vilai i na mai.

Bega Fita i velu'ase'asedi 'aseta mogitana Iesu faifaina 'waineye i na tovtovoi fa'alina. Iesu yana 'ivogavogana lamuna fai Yaubada nuanuana tomotoga nagami i na nuaviladi mulieta i na mai. De'e letanina 'ana 'idi side bani'odi.

Vona-vekaiwa. 1:1-2

Yaubada i venua'ivinedaga nuanuana taunida ta na tauyeda 'waineye. 1:3-15

Yaubada yana tolu'ivonavo wata tomata'aulelevo yadi lu'ivona Iesu faifaina vona mogitana. 1:16-21

I matakia tove-vekavekali faifaidi. 2:1-22

Iesu yana vila-vaitugana faifaina. 3:1-18

¹ Yau Saimoni Fita, Iesu Keliso yana tofolova wata 'ana tomata'aulele a vekaiwa 'omi Iesu 'ana tovetumaganavo 'waimie. 'Ada To'ita'ita'i Iesu Keliso 'asa'aiana taunina yada Yaubada, vetumagana i velema yana veimea tonovina 'wainega, 'omi wata bani'odi vetumagananina i velema, naninina 'ai'aiwabu bwaikina 'waideye. ² ☆A vevelu'ui faifaimi nuanuaku yami 'aseta Yaubada

☆ **1:2:** Kolos 1:9-10; Fil 3:10

wata 'ada Toveimea Iesu faifaidi i na veveb-waika bega ma yadi nuakalikali i na vevesauluva 'atumaina 'waimie wata tutuya matatabuna nu-anua bikana mia 'atumaina taiadi i na velevelemi.

Kebu ta na 'ivemweamweadaga.

³ ✧Yaubada yana toketokena 'wainega nani matatabuna 'akonadi i veleda 'ada fata bega yada mia wata yada sauluva i na ve'atumi yana nuanua bani'odi. Yana 'aivaitanina 'wainega taunina ta 'asetai, kumanina i venum'ivineda, bega yana 'ai'aiwabu magemagetadi wata yana 'atumaina i na veleda.

⁴ ✧Wata yana toketokenanina 'wainega 'ada nuakalikali bwaikidi wata 'atumaide i veleda, kumanidiavo faifaidi basenadi i vona'awaufaufa. Nuakalikalinidi 'waidiega taunina yana nuanua wata yana sauluva i veleda nika 'ada fata bunu 'ana nuanua sakoidi 'awasasadeye ta na degedi. ⁵ ✧Fai naninidi 'atumaide ta veluagadi

Yaubada 'wainega wata fai 'wa vetumagana Keliso 'waineye, begaidi i lubwainemi ma yami tokemaiga 'wa na vevevavawava yami sauluva i na ve'atumi. I na ve'atumaiga 'asetai 'wa na lalauala bega Yaubada yana nuanua 'wa na 'asetadi. ⁶ 'Akonadi 'wa na 'asetaga taunimi

yami nuanua 'wa na 'isave'avinidi bega i na nagoga ma yami tokemaiga Yaubada yana nuanua 'wa na 'i'idewadi. ⁷ 'Akonadi yana nuanua 'wa na 'i'i'dewadiga 'ami fata 'wa na veiaiana tomotoga taiadi, i na nagoga nika 'wa na nuakalikali edi mogitana. ⁸ 'Ai'edi sauluvanidi i

✧ **1:3:** Efe 3:16-19 ✧ **1:4:** Ion 1:12; Fol 17:28; 2 Kol 3:18 ✧ **1:5:** Gal 5:22-23

na vevebwaika 'waimie 'ada Toveimea Iesu Keliso 'wa na 'asetai mogitana bega yami folova faifaina kebu nani-'avo'avovo, ma vuagina. ⁹ ✧ We'e egavo sauluvanidi kebu 'waidie i da 'eno'enoviga, 'ana 'isa Yaubada yana nuanua kebu i da 'isa'inanadi wata 'akonadi nuadi i fani yadi sauluva sakoidi basenadi i 'idewadiga Iesu i iwalekolekoadi.

¹⁰⁻¹¹ Ekwavo, 'akonadi 'wa 'asetai Yaubada i venua'ivinemi nuanuana 'omi yana tomotoga, begaidi i lubwainemi 'wa na tokemaigemi sauluvanidi 'atumaidi 'waidie bega yana venua'ivinanina i na 'eno-vagata. 'Ai'edi mogitana bani'odi 'wa na vesauluvediga, kebu 'ana fata Iesu 'wa na baileni wata kebu 'wa na be'u sakona 'waineye, we'e Yaubada ma yana sosoana i na tauyemi mogitana 'wa na luku Iesu Keliso yana 'Eba Veimea miamia-vagaina 'waineye, taunina 'ada Toveimea wata 'ada To'ita'ita'i.

Tomata'aulele yadi lu'ivona Keliso faifaina vona mogitana.

¹² Naninidi 'akonadi 'wa 'asetadi wata Yaubada yana Vona 'akonadi 'wa nogaidiga 'wa veve-matayakeyakedi, siwe fai mogitana Yaubada i venua'ivinemiga begaidi tutuya fuedi a na totolinuata'i 'waimie. ¹³⁻¹⁴ ✧ Yau sai'afoga fwayafwaya de'e a na 'iaweni bani'odi basenadi 'ada Toveimea Iesu Keliso i voneku. I lubwaineku ma yawaikuye a na vonavona naninidi yami sauluva 'atumaidi faifaiddi bega 'wa na nuanuanidi. ¹⁵ Begaidi nuanuaku bwaikina a na vewavawava tamu 'eda'eda a na 'idewai bega bola a na 'iawemiga, 'wainega tutuya fuedi naninidi 'wa na nunuave'avinidi.

16 ✧ Tutuyanina 'a wai 'waimie 'ada Toveimea Iesu Keliso yana toketokena wata yana vila-vaitugana faifaidi 'a lau'age 'waimie. Yama lau'agenina kebu tomotogaotoga ma yana 'aseta 'ana ifuifufu bega i na vekalieda, Keliso yana 'ai'aiwabu mataududulina taunima matamega 'a 'iseni bega 'a lu'ivona 'waimie. 17-18 Basenadi Iesu taiadi 'a laka 'oya tabutabuna 'waineye 'a miamia nika Yaubada Tamada awa'ai'ai wata mageta mataududulina i veleni, wata bona 'a nogai Yaubada Magemagetana 'wainega i vo, De'e Natuku nuafouku a nuakalikalieni bwaikina, faifaina a sosoana mogitana.” Vona mogitana 'ima taunima bonanina 'a nogai abamega.

Tolu'ivonavo yadi lu'ivona Keliso faifaina vona mogitana.

19 ✧ Basenadiotoga Yaubada yana tolu'ivonavo i vona-vagata Keliso yana mai faifaina. Fai taunima 'a 'iseni 'ada fata ta na vetumagana ta na nuani mogitana tolu'ivonanidi yadi vona matatabuna vona mogitana. Begaidi i lubwainemi yadi vonanidi 'wa na nuanuanidi, 'waimie bani'odi mageta i magemagetai dudubala nageneye. 'Wa na nuanuanidi i na nagoga nika nuami i na magetadi bani'odi Kumauloku i lakalaka tutuya i kilikililia. 20-21 ✧ Vonanidi i maia Yaubada yana tolu'ivonavo 'waidiega kebu taunidi yadi nuanuayega, we'e mogitana 'Anu'anunu 'Atumaina yadi nuanua i 'ona'onadi bega Yaubada yana Vona i lulu'ivoneyedi. Begaidi vona de'e kebu nuami i na fani 'wa na

✧ 1:16: Mad 17:1-5 ✧ 1:19: Luk 1:76-79 ✧ 1:20-21: 2 Tim 3:16; Fol 3:21

nuanuanidi. Side bani'odi, kebu tamu aitoi 'ana fata 'aise'avana tolu'ivonavo yadi vona Yaubada yana Buki nageneye i na kiavemagetadi, nagami 'Anu'anunu 'Atumaina i na 'ivaiseni.

2

Tove-vekavekali faifaidi.

¹ ✧ Vona mogitana 'asete ta veluagai Yaubada yana tolu'ivonavo 'waidiega, siwe wata basenadi tolu'ivona-vekavekali i tovoi tomotoga i vekaliedi. Wata bani'odi 'awaie tove-vekavekali i na souyedi 'awasasamie, givagivayega yadi ve 'oka'okadi 'waidiega 'ifwaimi i na vekaliemi bega yami vetumagana i na 'ivesakodi. 'Ada Toveimea Iesu tovenidi i tuveobudiga siwe i na ve'eweni, begaidi 'adi vematavuloga i na veluaga-matayo'oi 'ai-'ala'alase. ² Tovenidi i na vo, 'Wa vetumaganaga Iesu 'waineye, bunu 'ana nuanua 'waidie ta na sakosakonaga, kebu tamu ava'ai." Yadi vekali 'waidiega fuedi yadi sauluva sakoidi i na vetutuyamedi, we'e tomotoga i na 'isedi, Keliso yana 'eda'eda i na awavesakoyeni. ³ ✧ Tovenidi, taunidi toluve'ove'o'olagi nuami i na 'ewadi ifuifufu-'avo'avovo taunidi i 'idewadiga 'waidiega, mani bwaikina 'wa na veleveledi. Basenadiotoga Yaubada 'adi vematavuloga i 'idewa-vagasedi, i lulukamata faifaidi.

⁴ ✧ I lubwainedi 'adi vematavuloga i na veluagadi fai basenadiotoga Yaubada yana anelose i sakonaga kebu i da 'isedimo, i tawedi Vatu'ai Manamanawena 'waineye. Bei

✧ **2:1:** VeL 13:1-5; Mad 24:24; Iud 1:4-8,17-18 ✧ **2:3:** Lom 2:24, 16:18 ✧ **2:4:** Mad 25:41

dudubala 'waineye i miamia 'adi vematavuloga i lulukamasedi vonayavuga 'ana tutuya 'waineye i na veluagadi. ⁵ ✧Wata bani'odi basenadiotoga Noa yana tutuye tomotoga fue di Yaubada i vedumwe'ai'aieni siwe kebu nuana i da loloiga mwai bwaikaotogina 'wainega 'ana tovedumwe'ai'ainidi i leodi fwayafwaya taiadi. Noa ma enavo ⁷ 'aisedi Yaubada i 'ita'ita'iedi fai taunina tolau'age sauluva tonovidi faifaina. ⁶ ✧Mulietta wata 'atamana 'ailuga Sodoma wata Gomola 'waidie Yaubada tosakona fue di i 'isedi bega i veimea vematavuloga sakoiotogina i veluagai, i leodi 'ai-'ala'alata 'wainega i ve'aufafa. 'Atamananidi 'ailuga Yaubada 'ana tovedumwe'ai'ai yadi 'eba 'isa bega i na 'iseni ma yadi kololo Yaubada i na ve'ililibuyeni yadi sauluva i na ve'atumai. ⁷⁻⁸ Tomotoganidi 'waidiega Lota 'aisena yana sauluva 'atumaina bega nagami Yaubada i 'ita'ita'ieni. 'Aiata 'aitamogana 'aitamogana tomotoganidi yadi sauluva sakoidi Lota i 'ise'isedi wata yadi vona i noganogaidi. Kebu nuanuadi Yaubada i na vematayakeyakeni, nuanuadi bwaikina bunu 'ana nuanua sakoidi begaidi Lota ma yana venuafouviga i nunuavita. ⁹ ✧Vona mogitana Yaubada Noa wata Lota i 'ita'ita'iedi bega ta 'asetai 'ana fata to'atumaina i na 'ita'ita'iedi vita 'waidiega we'e tosakona 'akonadi i veveimeyedi i na nagoga mulietta tutuyanina ta na vonayavuga Yaubada mataneye 'adi vematavuloga i na veluagai. ¹⁰ Tosakona matatabudi siwe mogitana

✧ 2:5: Ibu 11:7; Nag 6:13,18 ✧ 2:6: Nag 19:12-13,24 ✧ 2:9: 1 Kol 10:13

egavo bunu 'ana nuanua sakoidi nuadi i 'ewadi, i veve'avula-'avo'avovo wata Yaubada yana veimea i sidibidibieni.

Tove-vekavekalinidi 'awasasamie i fwausa-'avo'avovo, taunidi i awa'ai'aidi we'e tomia abama kebu i da ve'ililibuyediga i awavesakoyedi.

¹¹ ✧ Anelose abame toketokeotogidi ma yadi veimea, tovenidi kebu bani'odiga, siwe kebu ma yadi manini tovenidi i da vevevitadi 'Auvea mataneyeye yadi sauluva sakoidi faifaiddi.

¹² Tove-vekavekalinidi kebu nuadiga naninidi i bavuyediga i sisidibidibiedi. We'e 'aisaya walawala'ai nua-'avo'avovodi, taunidi yadi nuanua i 'i'idewadi mulieta tomotoga i vunuvunugidi. Tove-vekavekalinidi 'aisaya bani'odi, wata taunidi yadi nuanua i 'i'idewadi, 'awaie 'adi vematafuloga i na veluagai i na wafaotoga.

¹³ Tomotoga 'ifwaidi yadi vetumagana i 'ivesakodi, 'adi tutula 'awaie vita i na veluagai Yaubada 'wainega. Lovana 'aiata taiadi i sosoana-'avo'avovo tomotoga matadie i sakosakona. Taiadi 'wa 'ani'ani 'wa vo 'ako, Tomotoga 'atumaidi," siwe ma yadi sosoana i vevekaliemi. 'Omi 'atumaimi we'e 'awasasamie bani'odi yoke i na vedamanimi. ¹⁴ Nuanuadi bwaikina vevine taiadi i na vevematafulu'isa. I sakosakona-vebogi siwe kebu 'anigodi i da toatoa. Tomotoga 'ifwaidi kebu yadi vetumagana fa'alinaga nuadi i 'ani'anidi i be'ube'u sakona 'waidie 'wa da vo i da 'e'edakumesedi kuli ma unana 'waineye. Tutuya fuedi i luluve'ove'o'olagi nuanuadi

✧ **2:11:** Iud 1:9-13

bwaikina kukua, ma yadi 'aseta mali tomotoga i vevekaliedi yadi mani i eloelodi. 'Akonadi Yaubada i veimea 'awaie 'adi tutula i na veluagadi. ¹⁵ ✧ 'Eda tonovina 'akonadi i 'iaweni i vuyo, Belami yana sauluva i 'ewai. Belaminina, taunina Beo natuna, tamu Yaubada yana tolu'ivona siwe mani 'ana nuakalikali 'waineye bwaikina, bega i sakona. Tamu toveimea nuanuana Belami i na 'ivaiseni me Isileli i na leodi siwe i nunago 'edeye yana 'aisaya doniki 'wainega, nago i baila. ¹⁶ 'Aisaya kebu 'adi fata i na vona, siwe tutuyanina 'waineye yana 'aisayanina 'awana i takai i vona Belami 'waineye, yana sauluva 'wa da vo 'wava'wava yadi sauluva, i talabodeni. Vona mogitana tovenidi sakoidi Belami bani'odi, toluve'ove'o'olagi.

¹⁷ Tomotoganidi kebu tamu sai'afo 'waidiega 'aivaita i na souyeni, 'wa da vo bani'odi ufa-luluvuala i da lala. Yadi nuanua kebu fa'alidiga bani'odi waowa kaukau i bewebewedi. Yaubada yadi 'eba mia i 'idewa-vagaseni i 'eno'eno Vatu'ai Manamanawena wata dududubalina 'waineye. ¹⁸ Taunidi i awa'ai'aidi yadi veifufu 'adi nogaya nani-'avo'avovo faifaidi, siwe 'waidiega tomotoga nuadi i 'ewadi. Tomotoga 'ifwaidi be'ama i vetumagana Iesu 'waineye i sousouyedi tosakona 'waidiega, siwe wata tovenidi i sisivemuliugadi bunu 'ana nuanua sakoidi 'waidiega. ¹⁹ ✧ 'I vonedi i vo, Yama ve 'wa na vetutuyamedi nika 'omi yavuyavumi, kebu tamu veimea 'wa na vematayakeyakeni.” Bani'odi i voneyediga siwe

✧ **2:15:** Num 22:12,15-17,21,23,28-34 ✧ **2:19:** Ion 8:34; Lom 6:16-17

sauluva sakoidi 'akonadi tovenidi i veveimeyedi. Vona mogitana, sauluva sakoidi tomotoga i 'i'idewadiga bani'odi 'adi toveimeavo, 'waidie i vevetofolova. ²⁰ ✧Egavo 'ada Toveimea Iesu Keliso taunina 'ada To'ita'ita'i Valana i 'asetai bega fwayafwaya 'ana nuanua sakoidi i degedi, siwe mulieta i na vila-vaituganidi, sakona i na 'ive'avinidi i na vetoketoke 'waidie, mogitana 'adi vematavuloga i na vebwaika-'afo'afo, kebu 'adi vematavuloga nagami bani'odi. ²¹ Nuakalikalidi. 'Ai'edi Iesu yana 'eda'eda tonovina kebu i da 'asetai yadi wafa 'waineye vita i da veluagai, siwe fai 'akonadi i 'asetai we'e Yaubada yana veimea magemagetadi nua'ubudie i yatodi bega vita bwaikaotogina i na veluagai. ²² ✧Yada 'eba awatalatutula i 'eno'enovi tovedumwe'ai'ainidi yadi sauluvanina faifaina. Ta vo, 'Ou'ou i na 'ovala, mulieta i na vilai, taunina 'ovalina i na 'ania.” Wata ta vo, 'Ai'edi tamu aitoi yana bawe i na vetoai, wata i na vilai i na nago i na ludobwadobwana.”

3

Toveimea Iesu yana vila-vaitugana faifaina.

¹ Ekwavo, de'e a kilukilumaga 'waimie, yaku leta 'ana veluaga. Letanidi 'ailuga 'waidie a kikiavenuave'avinimi, nuanuaku nuanua tonovidi faifaiddi 'wa na nuanua. ² Vonanidi basenadiotoga Yaubada yana tolu'ivonavo magemagetadi i lu'ivoneyediga, wata Toveimea Iesu 'ada To'ita'ita'i yana veimea 'ima yami

✧ **2:20:** Mad 12:43-45; Ibu 6:4-6; Mad 26:24 ✧ **2:22:** Voa 26:11

tomata'aulelevo 'a velemiga, nuanuaku 'wa na nuanuanidi.

³ ✧ We'e tamu nani nuanuaku nagami 'wa na 'asetai. Tutuya 'eba ve'a'ava sai'afoga i na velilivana, 'ifwaidi tomotoga i na tovoi, taunidi yadi nuanua sakoidi i na 'idewadi wata i na sidibidibiemi. ⁴ I na vo, Basenadi Iesu i vona'awaufaufa i na vilai i na mai, siwe ava'aibe taunina? 'A nuani kebu tamu sai'afo i na mai. Fwayafwaya 'ana 'idewavau 'wainega i maiga 'asiau nani matatabuna 'asa'aiana 'adi 'isa'isanidi i 'eno'enov. Tubumavo basenadiotoga i wafa i maiga 'asiau kebu tamu nani i da vetuli. We'e igodi 'wa vo, Iesu i na vilai i na mai vematavuloga faifaina.” ⁵⁻⁶ ✧ Siwe tomotoganidi kebu nuanuadi i na nuani basenadiotoga tomotoga matatabudi Yaubada i leodi ufayega, 'adi vematavuloga. Side bani'odi. Basenadiotoga Yaubada i vona, abama i souyeni wata ufa 'wainega fwayafwaya i 'idewai, bega ufanina fwayafwaya i sififineni. Mulieta ufanina mwai 'wainega fwayafwaya i 'ivesakoi tomotoga i leodi. ⁷ ✧ We'e abama* wata fwayafwaya 'asiau ta 'ise'isediga, 'akonadi Yaubada i vona 'awaie i na kabunidi i na 'alaidi siwe bola, i lulukamata bega tutuyanina tomotoga i na vonayavuga Yaubada mataneyeye, bei nani matatabuna i na leodi 'ana tovedumwe'ai'ai taiadi.

⁸⁻⁹ ✧ Ekwavo, we'e tamu nani nuanuaku 'wa na nuani. Tomotoga 'ifwaidi i vo, Basenadi

✧ **3:3:** 1 Tim 4:1; Iud 1:17-18 ✧ **3:5-6:** Nag 1:2,6-9, 7:11,17,23

✧ **3:7:** 1 Kol 3:13 * **3:7:** Abamaotoga bei inala, weta'i wata 'ubwana i 'eno'enoviga i na kabunidi, we'e bei Yaubada i miamiaga kebu.

✧ **3:8-9:** Same 90:4; Isi 18:23; 1 Tim 2:4

'ada Toveimea Iesu i vona'awaufaufa i na vilai i na mai, siwe awale i 'ivogavogana kebu i da mimai-matayo'o?" Kebu i da 'ivogavoganaga fai malamala 1000 tutuya manamanawena 'ida 'waideye, we'e Yaubada 'waineye 'wa da vo 'aiata 'aitamogana 'ana vemanawe. 'Aiata wata malamala Yaubada kebu faifaidi i da nuanua siwe ma yana tokemaiga i lulukamasemi, kebu nuanuana tamu aitoi i na luku 'ai-'ala'alase, nuanuana nagami tomotoga matatabudi i na nuaviladi yadi sakona 'waidiega.

10 ✧! Ada Toveimea Iesu yana vila-vaitugana 'ana 'aiata kebu i na lu'ivoneyeniga, ta na miamiamo nika i na souyeni tomotoga yawaidi i na lovoga. 'Aiatanina 'waineye, inala, weta'i wata 'ubwana i na toafwai butu'aidi bwaikidi nika ava'aiamo i na nago, we'e nani matatabudi fwayafwaya taiadi i na 'ala'a'avadi.

11-12 Vona mogitana nani matatabudi i na 'ala'a'avadi, we'e 'omi bani'odi? I lubwainemi tutuya de'e Yaubada yana 'aiatanina 'wa na lulukamaseniga, taunimi 'wa na tauyemi Yaubada 'waineye yami sauluva i na ve'atumai yana nuanua bani'odi. 'Ai'edi Yaubada yana nuanua ta na vematayakeyakediga Iesu yana Vila-vaitugana 'ana 'Aiata ta na duduni i na vagamai. 'Aiatanina 'waineye yauyauta bwaikina inala, weta'i wata 'ubwana i na itana, nika nani matatabudi i na sayovola. 13 ✧ Siwe 'akonadi Yaubada i vona'awaufaufa abama wata fwayafwaya 'ivaudi i na 'idewadi, bei sauluva 'atumai'avadi i na 'eno'novi, naninidi faifaidi ta

✧ 3:10: Mad 24:35,43-44 ✧ 3:13: Ais 65:17; Ve 21:1,27

lulukamata.

¹⁴ Ekwavo, vona mogitana Yaubada fwayafwaya 'ivauna i na 'idewai begaidi 'aiatanina faifaina 'wa na lulukamataga, nuanuaku ma yami tokemaiga 'wa na vevewavawava yami sauluva 'atumai'avadi Yaubada mataneyeye wata taiadi 'wa na veveiana bega kebu tamu nani faifaina i na awavesakoyemi. ¹⁵ ✧'Ada Toveimea kebu i da mimai-matayo'oga lamuna side bani'odi. Ma yana tokemaiga i lulukamata nuanuana nagami Valana 'Atumaina ta na lu'ivona tomotoga 'waidie bega 'ana fata 'wainega 'ita'ita'i i na veluagai. Iada Faulo yana nuanua wata bani'odi, ma yana 'aseta Yaubada 'wainega 'akonadi i lu'ivona 'waimie leta 'wainega. ¹⁶ ✧Tutuya fue di i kilukilumaga Iesu yana vila-vaitugana faifaina, side bani'odi i kilukilumedi. We'e 'ana kilukiluma 'waidie nani 'ifwaidi 'adi 'aseta vitadi, naninidi tomotoga yadi nuanua mweadi wata bavubavudi taunidi yadi nuanuayega i sisiviladi i 'ivesakodi. Faulo 'ana kilukiluma wata 'ifwaidi vona Yaubada yana Buki 'wainega wata bani'odi i 'ivesakodi bega taunidi i 'iveilagidi 'awaie i na wafaotoga.

¹⁷ ✧We'e ekwavo, 'omi 'akonadi 'wa 'asetai tove-vekavekali yadi nuanua 'waidiega Yaubada yana Vona i 'i'ivesakoidi begaidi taunimi 'wa na 'i'isave'avinimi i na nunago Yaubada yana veimea 'ana tovedumwe'ai'ai i na silolomi yadi vekaliega nika 'wa na be'u yami 'eba mia toketokena 'wainega. ¹⁸ Nuanuaku yami 'aseta 'ada Toveimea

✧ 3:15: Lom 2:4, 10:21 ✧ 3:16: 2 Kol 4:3; Ibu 5:11 ✧ 3:17: Ibu 2:1; 1 Kol 10:7-11

Iesu Keliso taunina 'ada To'ita'ita'i faifaina i na vevebwaika, wata 'wa na tovoi fa'alina 'waineye bega tutuya fuedi ma yana nuakalikali i na vevesauluva 'atumaina 'waimie. Taunina ma 'ana ve'ililibu yana 'ai'aiwabu magemagetadi kebu i na 'a'avaga, i na 'eno-vagata.

Vona mogitana yaku nuanua bani'odi,
Yau Fita.

YAUBADA YANA VONA'AWAUFAUFA 'IVAUNA
The New Testament in the Iamalele Language of Papua
New Guinea

Nupela Testamen long tokples Iamalele long Niugini

copyright © 1984, 1988 Wycliffe Bible Translators, Inc.

Language: Iamalele

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 11 Nov 2022 from source files dated 9 Oct 2020

db771331-f438-5051-a7d5-80ea6197c078